

## Téamaí le breithniú

### Cumarsáid faoi alt 9 den Acht (Litreacha, ríomhphoist & cora poist)

Dualgais reatha faoin Acht:

- Cumarsáid a fhreagairt sa teanga ina bhfuarthas í;
- Faisnéis i scríbhinn nó leis an bpost leictreonach a eisiúint i nGaeilge nó go dátheangach.

#### 1. *I do thuairimse, an leor na dualgais seo, an bhfuil siad iomarcach nó an dteastaíonn leasú orthu?*

Tá na dualgais faoi Alt 9(2) agus (3) riachtanach.

Maidir le hAlt 9(3), níor mhiste a dheimhniú i gcás cumarsáid i scríbhinn nó leis an bpost leictreonach a eisítear go dátheangach –

- i. gurb é an leagan i nGaeilge a bheidh chun tosaigh;
- ii. go mbíonn an leagan i nGaeilge ar chomh mhéid agus chomh feiceálach céanna leis an leagan i mBéarla agus go ndéantar idirdhealú soiléir idir an dá leagan;
- iii. go bhfuil an brí céanna ag an leagan i nGaeilge agus an leagan i mBéarla, agus nach n-úsáidtear béarlagar ach leagan caighdeánach atá soléite agus sothuigte sa dá theanga oifigiúil;

trí leasú dá réir a chur leis an alt seo.

I gcás cumarsáid i scríbhinn nó leis an bpost leictreonach le poba(i)l na Gaeltachta, is den riachtanas go mbeadh foráil reachtúil ann a chinntíonn gur trí mheán na Gaeilge a dhéantar an chumarsáid sin.

### Foilseacháin faoi alt 10 den Acht

Dualgais reatha faoin Acht:

- Doiciméid áirithe a fhoilsiú go comhuaineach i nGaeilge agus i mBéarla (m.sh. tuarascálacha bliantúla, cuntais iniúchta, tograí beartais phoiblí, ráitis straitéise srl.

#### 2. *I do thuairimse, an leor na dualgais seo, an bhfuil siad iomarcach nó an dteastaíonn leasú orthu?*

Aithnítear go gcuimsíonn an dualgas ar chomhlachtaí poiblí faoi Alt 10 doiciméid áirithe a fhoilsiú i nGaeilge agus i mBéarla doiciméid nach mbeadh suim ag an ngnáthshaoránach iontu, bíodh siad siúd ar fáil i nGaeilge nó i mBéarla. Níor chóir, áfach, leasú a dhéanamh ar an alt seo bunaithe ar cheisteanna praiticiúla amháin. Ní mór a aithint go bhfuil tábhacht le foilsiú cáipéisí áirithe a bhfuil stádas ag baint leo go dátheangach, rud atá riachtanach chun úsáid na Gaeilge i ngníomhaíochtaí an Stáit a éascú agus a chinntiú agus chun cur leis na deiseanna don phobal gnó a dhéanamh leis an gcóras poiblí trí mheán na Gaeilge.

Moltar cur le liosta na gcáipéisí luaite faoi Alt 10 ar bhonn tosaíochta agus de réir éilimh ón bpobal. Bheadh sé go mór chun tairbhe úsáid na Gaeilge leis an gcóras poiblí dá mbeadh dualgas ar gach comhlacht poiblí faoi Alt 10 gach foirm iarratais, fiosrúcháin agus gearáin a fhoilsiú go dátheangach, lena n-áirítear foirmeacha atá ar fáil ar láithreáin ghréasáin na gcomhlachtaí poiblí.

Maidir le dearadh agus leagan amach na gcáipéisí agus na foirmeacha, ba chóir go mbeadh an Ghaeilge agus an Béarla faoi aon chlúdach amháin, agus taobh le taobh i gcónaí.

Moltar go mbunófaí córas náisiúnta caighdeánach maidir le cúrsaí foilseacháin, le leaganacha oifigiúla comónta d'fhoilseacháin dhátheangacha ionas go seachnófaí aistriúchán ar fhoilseacháin a bheith ann faoi dhó, ag comhlachtaí poiblí éagsúla.

Ba chóir tosaíocht a thabhairt do sholáthar eolas go dátheangach don phobal ar láithreáin gréasáin na gcomhlachtaí poiblí trí leasú a dhéanamh dá réir ar Alt 10.

Maidir leis an riachtanas faoin mBunreacht go bhfoilsítear Achtanna an Oireachtais sa dá theanga oifigiúil, moltar go ndéanfaí Billí an Oireachtais a aistriú go Gaeilge fad is atá siad ag dul tríd an Dáil, rud a chabhródh go mór le haistriúcháin ar Achtanna an Oireachtais a bheith ar fáil in am d'fhoilsiú gach Achta go comhuaineach sa dá theanga oifigiúil.

### **Comharthaí, stáiseanóireacht & fógartí taifeadta béil faoi na Rialacháin faoin Acht (I.R. Uimh. 391 de 2008)**

Dualgais reatha faoin Acht:

- Cloí leis na Rialacháin maidir le húsáid na Gaeilge agus an Bhéarla ar chomharthaí, ar stáiseanóireacht agus i bhfógartí taifeadta béil.

### **3. *I do thuairimse, an leor na dualgais seo, an bhfuil siad iomarcach nó an dteastaíonn leasú orthu?***

Tá na dualgais a leagtar síos faoi na rialacháin faoi Alt 9(1) den Acht rí-thábhachtach chun feiceálacht na Gaeilge a mhéadú agus chun cur le stádas na teanga i measc an phobail.

I gcás ainmneacha na gcomhlachtaí poiblí, ba chóir go dtabharfaí tús áite don leagan Ghaeilge de na hainmneacha sin i gcónaí. Anuas ar sin, ba chóir go mbeadh dualgas reachtúil ann a chinntíonn go mbeidh ainm gach comhlachta poiblí nua a bhunaítear amach anseo as Gaeilge agus go n-úsáidfí an t-ainm sin i gcónaí.

Maidir le lógónna na gcomhlachtaí poiblí, tá na lógónna sin lárnach d'íomhá poiblí na gcomhlachtaí. Is gá, dá réir, féachaint chuige go ndéanfar na rialacháin a leasú le go mbeidh an Ghaeilge chomh feiceálach céanna leis an mBéarla ar lógónna na gcomhlachtaí poiblí reatha agus nua.

### **Comharthaí Bóithre**

Ba chóir go leagfaí síos teorainn ama réadúil chun na comharthaí bóithre a chaighdeánú ó thaobh dathanna na gcomharthaí bóithre agus conas barr feabhais a chur ar chruth na bhfocal. Moltar –

- i. gurb é an leagan i nGaeilge a bheidh chun tosaigh ar gach comhartha;
- ii. go mbíonn an leagan i nGaeilge ar chomh mhéid agus chomh feiceálach céanna leis an leagan i mBéarla agus go ndéantar idirdhealú soiléir idir an dá leagan;
- iii. go bhfuil an brí céanna ag an leagan i nGaeilge agus an leagan i mBéarla, agus nach n-úsáidtear béarlagair ach leagan caighdeánach atá soléite agus sothuigte sa dá theanga;

Moltar *Lámhleabhar na gComharthaí Trácht*a agus na *Rialacháin Chomharthaíochta* a chónascadh ionas go mbeidh treoir chuimsitheach amháin ar fáil.

### **Scéimeanna Teanga faoin Acht**

Is iad na scéimeanna teanga croílár an Achta Teanga. Leagtar amach sna scéimeanna teanga an córas trína bhforbraíonn comhlachtaí poiblí a gcuid seirbhísí trí Ghaeilge thar thréimhse ama. Is trí na scéimeanna teanga a dhéileáiltear le húsáid na Gaeilge ar shuíomhanna gréasáin, ar bhileoga, ar bhróisiúir, ar fhoirmeacha, trí sheirbhísí teileafóin, trí sheirbhísí idirphearsanta eile, trí sheirbhísí ar líne srl.

**4.(a) *I do thuairimse, an bhfuil córas na scéimeanna teanga sásúil, an bhfuil sé iomarcach nó an dteastaíonn leasú air?***

**4.(b) *An bhfuil malairt córais a mholfá a bheadh níos éifeachtaí agus níos éifeachtúla?***

Córas na scéimeanna teanga an phríomh-mhodh a úsáideann na comhlachtaí poiblí chun seirbhísí Gaeilge a chur ar fáil faoin Acht. Níl ag éirí leis an gcóras sin faoi láthair, áfach, agus is gá aghaidh a thabhairt ar an gceist seo go práinneach.

Moltar ar an gcéad dul síos go mbeidh leasuithe ar an Acht bunaithe ar chearta teanga, in áit a bheith bunaithe ar ghealltanais na gComhlachtaí Poiblí. Maidir le córas na scéimeanna, moltar –

- i. go bhforbrófaí córas nua le caighdeán a bheadh bunaithe ar rialacháin reachtúla;
- ii. go ndéanfaí aicmiú ar chomhlachtaí poiblí de réir an réimse feidhme agus na sainseirbhísí agus seirbhísí líne tosaigh don phobal;
- iii. go mbeadh soláthar comhleibhéal seirbhísí mar bhunriachtanas d'eagraíochtaí sna réimsí céanna, m.sh comhairlí contae Gaeltachta;
- iv. go leanfaí cur chuige cosúil le samhail Cheanada, is é sin “an tairiscint ghníomhach” a chiallóidh go mbeadh ar chomhlachtaí poiblí a gcuid seirbhísí a fhógairt agus a chur in

iúl don phobal. Ní mór do gach comhlacht poiblí éileamh ar sheirbhísí a chothú agus an pobal urlabhra a spreagadh;

- v. go mbeadh sé soiléir don chainteoir Gaeilge céard iad na seirbhísí atá ar fáil dóibh. Tá gá le haiseolas a bhailiú go gníomhach ó chustaiméirí le caighdeán seirbhísí faoin Scéim a dheimhniú.
- vi. go gcuirfí forálacha leis an Acht, ionas go mbeadh dualgais reachtúil i dtaobh an Achta ar fhochonraitheoirí a earcaíonn Comhlachtaí Poiblí chun seirbhísí a chur ar fáil don phobal thar ceann an Chomhlachta Phoiblí;
- vii. go mbunófaí Deasc Cúram Custaiméirí laistigh de Chomhlachtaí Poiblí chun freastal ar fhiosrúcháin ón bpobal sa dá theanga oifigiúil;
- viii. go mbeadh Oifigeach Forbartha Gaeilge ag aon eagraíocht atá ag freastal ar an nGaeltacht nó ar phobal láidir teanga.

#### **Seirbhísí ó chomhlachtaí poiblí sa Ghaeltacht**

Sa chaoi is gur féidir leis an Stát tacú le stádas agus le húsáid na Gaeilge sa Ghaeltacht, tá sé an-tábhachtach go mbeidh pobal na Gaeltachta ábalta a ngnóthaí oifigiúla a dhéanamh leis an Stát trí Ghaeilge.

- 5.(a) *An bhfuil tú sásta leis na seirbhísí atá á soláthar trí Ghaeilge ag comhlachtaí poiblí sa Ghaeltacht?***
- 5.(b) *An bhfuil leasuithe a mholfá a chuirfeadh le héifeachtacht agus le héifeachtúlacht na gcomhlachtaí poiblí sa réimse seo?***

Tá sé riachtanach go mbeadh seirbhísí uile an Stáit ar fáil sna ceantair Ghaeltachta i nGaeilge, agus go mbeadh na seirbhísí sin ar chomhchaighdeán leis na seirbhísí atá ar fáil i mBéarla i gceantair eile .

Is gá go mbeadh an Ghaeilge mar phríomhtheanga oibre ag gach oifig de chuid na gcomhlachtaí poiblí atá lonnaithe sa Ghaeltacht. Anuas ar sin, ní mór do chomhlachtaí poiblí a bhfuil baint mhór acu le pobal na Gaeltachta agus / nó a bhfuil ceantair Ghaeltachta ina limistéir feidhme a chinntiú go bhfuil cohórt d'fhoirne na gcomhlachtaí poiblí sin dátheangach.

Moltar gur gá tabhairt faoi fheachtas feasachta teanga, agus feachtas feasachta cearta, chun muintir na Gaeltachta, lucht labhartha na Gaeilge, agus an saol níos leithne araon a chur ar an eolas faoina gcearta teanga.

#### **Forálacha eile faoin Acht**

Tá forálacha eile san Acht a dhaingníonn cearta maidir le húsáid na Gaeilge san Oireachtas, sna cúirteanna agus i gcóras logainmneacha an Stáit.

**6. *I do thuairimse, an leor na forálacha seo, an bhfuil siad iomarcach nó an dteastaíonn leasú orthu?***

**San Oireachtas**

Mar a luadh ag ceist 2 thuas, moltar go ndéanfaí Billí an Oireachtais a aistriú go Gaeilge fad is a atá siad ag dul tríd an Dáil, rud a chabhródh go mór le haistriúcháin ar Achtanna an Oireachtais a bheith ar fáil in am d'fhoilsiú gach Achta go comhuaineach sa dá theanga oifigiúil. Ba chóir an dualgas sin a dhaingniú trí fhoráil reachtúil dá réir a chur leis an Acht.

Ba chóir gach reachtaíocht thánaisteach a fhoilsiú go dátheangach freisin.

**Sna Cúirteanna**

Is gá a chinntiú nach mbíonn saoránach faoi aon mhífbhuntáiste nuair a thagann said os comhair na gcúirteanna de bharr an rogha teanga a dhéanann siad. Chuige sin, ní mór a chinntiú

- i. go bhfuil Gaeilge ar a t(h)oil ag gach breitheamh a éisteann cás i nGaeilge nó go dátheangach sa dá theanga oifigiúil;
- ii. go bhfuil Gaeilge ar a t(h)oil ag gach oifigeach de chuid na gcúirteanna a bhíonn ag plé le cás a éistear i nGaeilge nó go dátheangach sa dá theanga oifigiúil;
- iii. go bpléann an breitheamh leis na páirtithe i gcúis sa teanga oifigiúil a roghnaíonn siad ag gach staid den chás, lena n-áirítear an breithiúnas; faoi seach.
- iv. gurb í an Ghaeilge atá mar theanga oibre i ngach cúirt sa Ghaeltacht, ach go ndéantar freastal mar is cuí orthu siúd a roghnaíonn Béarla a úsáid.

**Logainmneacha**

Is gá tacaíocht a thabhairt d'obair Bhrainse na Logainmneacha lena chinntiú go mbíonn leagan cruinn de gach logainm sa tír ar fáil sa dá theanga oifigiúil.

**Comhlachtaí poiblí faoin Acht**

Cuireann an tAcht dualgas ar chomhlachtaí poiblí, atá liostaithe faoin Acht, seirbhísí a sholáthar trí Ghaeilge. Tá liosta iomlán na gcomhlachtaí poiblí faoin Acht ar fáil ag [www.ahg.gov.ie](http://www.ahg.gov.ie).

Tá na comhlachtaí poiblí seo a leanas liostaithe faoin Acht – Ranna agus oifigí Rialtais, údaráis áitiúla, ollscoileanna, institiúidí tríú leibhéal eile, coistí gairmoideachais, an Garda Síochána, an tSeirbhís Chúirteanna, na Coimisinéirí Ioncaim, Feidhmeannacht na Seirbhíse Sláinte, gníomhaireachtaí, boird & cuideachtaí Stáit eile.

**7. *I do thuairimse, an bhfuil liosta na gcomhlachtaí poiblí faoin Acht cuí nó an dteastaíonn leasú sa réimse seo?***

Moltar go ndéanfaí leasú ar an Acht le go dtitfeadh dualgais an Achta ar gach Comhlacht Poiblí nuabhunaithe go huathoibríoch ag am a bhunaithe, .i. go mbeadh comhlachtaí poiblí nuabhunaithe curtha go huathoibríoch le sceideal na gcomhlachtaí poiblí faoin Acht.

Anuas ar sin, ba chóir go mbeadh forálacha an Achta Teanga i bhfeidhm ar chomhlachtaí a thagann faoi choimirce an Stáit, comhlachtaí príobháideacha ina measc, m.sh. na bainc, comhlachtaí leath-stáit, agus fochonraitheoirí a sholáthraíonn seirbhísí thar ceann na gcomhlachtaí poiblí.

#### **Oifig an Choimisinéara Teanga**

Is faoin Acht a bunaíodh Oifig an Choimisinéara Teanga. Is é príomhról na hOifige ná monatóireacht a dhéanamh ar chur i bhfeidhm an Achta.

#### **8. *I do thuairimse, an bhfuil cumhachtaí agus feidhmeanna na hOifige sin dóthanach nó iomarcach agus an dteastaíonn leasuithe orthu?***

Moltar go láidir go gcosnófaí neamhspleáchas Oifig an Choimisinéara Teanga agus **nach** gcónascfaí é le hOifig an Ombudsman.

Ba chóir feidhmeanna Oifig an Choimisinéara Teanga a bhreithniú i gcomhthéacs aon chóras nua a thiocfaidh i gcomharbacht ar chóras na scéimeanna teanga atá ann faoi láthair.

#### **Go ginearálta**

#### **9. *An bhfuil leasuithe eile a mholfá ar an Acht le cinntiú gur reachtaíocht í atá oiriúnach agus cuí dá feidhm?***

##### **Athbhreithniú an Achta teanga**

Moltar go gceapfaí athbhreithneoir neamhspleách ar an gcomhairliúcháin poiblí mar chuid den athbhreithniú ar Acht na dTeangacha Oifigiúla 2003. Moltar saineolaí teanga idirnáisiúnta don ról sin.

##### **Polasaí Earcaíochta an Státchórais**

Moltar go láidir polasaí earcaíochta don tseirbhís phoiblí a chur ar bun faoi bhun rialachán reachtúla a chinnteodh go mbeadh céatadán áirithe d'fhoirne na gcomhlachtaí poiblí dátheangach agus inniúil seirbhís a sholáthar ar ardchaighdeán sa dá theanga oifigiúil.

Ba cheart róil áirithe a aithint mar róil a bhfuil cumas sa Ghaeilge / cumas dhátheangach riachtanach, agus níor cheart daoine nach bhfuil cumas acu sa dá theanga oifigiúil a cheapadh sna róil seo.

Moltar go gceapfaí sainpholasaí oiliúna don tseirbhís phoiblí chun cur le cumas na foirne seirbhísí trí Ghaeilge a sholáthar.

Moltar go gcuimseofaí modúl ar an bhfeasacht teanga mar chuid de na cúrsaí insealbhaithe, oiliúna agus seirbhís ardchaighdeán do Chustaiméirí araon lena chinntiú go dtuigeann baill

foirne impleachtaí Acht na dTeangacha Oifigiúla agus tionchar an Achta ar a gcuid oibre.

### **An Earnáil Phríobháideach**

Ba chóir go mbreathnófaí ar bhonn tosaíochta ar fhorálacha an Achta Teanga a leathnú chun comhlachtaí san earnáil phríobháideach a thógáil san áireamh, ach go háirithe na comhlachtaí a sholáthraíonn seirbhísí go díreach don phobal, lena-áirítear na bainc, agus fochonraitheoirí a sholáthraíonn seirbhísí thar ceann na gcomhlachtaí poiblí, mar shampla Dublin Bikes mar fhochonraitheoir de chuid Comhairle Cathrach Bhaile Átha Cliath nach bhfuil dualgais teanga orthu seirbhísí a sholathar go dátheangach.

#### **10. Céard iad na seirbhísí trí Ghaeilge a bhfuil éileamh agat féin orthu ó chomhlachtaí poiblí nó an gceapann tú gur cheart tosaíocht a thabhairt dóibh?**

Is gá go mbeadh gach seirbhís ón Stát don phobal ar fáil trí mheán na Gaeilge chun feidhm phraiticiúil a thabhairt do sheasamh na Gaeilge faoi Airteagal 8 den Bhunreacht. Is gá a chinntiú go dtagann gach leasú molta ar Acht na dTeangacha Oifigiúla 2003 leis an seasamh sin agus go dtugann feidhm iomlán do stádas na Gaeilge mar theanga náisiúnta agus mar phríomhtheanga oifigiúil an Stáit.

#### **11. Céard iad na constaicí nó na deacrachtaí a fheictear duit a bhaineann le seirbhísí ar chomhchaighdeán a sholáthar i nGaeilge ag comhlachtaí poiblí?**

Easpa cumais Ghaeilge na foirne sna comhlachtaí poiblí an constaic is mó a bhaineann le seirbhísí ar chomhchaighdeán a sholáthar i nGaeilge ag comhlachtaí poiblí.

I measc na gconstaicí eile tá –

- Easpa feasachta teanga sna comhlachtaí poiblí ar na dualgais a leagtar síos faoin Acht Teanga;
- Easpa feasachta i measc an phobail trí chéile ar a gcearta teanga;
- Easpa tuisceana ar áisiúlacht bhreise na Gaeilge agus drogall institiúideach a léiríonn go bhfuil naimhdeas i gcoinne na Gaeilge, nó ar a laghad patuar, ann i gcónaí;
- Easpa ceannasaíochta na Roinne Ealaíon, Oidhreacht agus Gaeltachta ar dhaingniú agus ar chur i bhfeidhm na scéimeanna teanga **AGUS** easpa dul chun cinn agus moilleadóireachta dá réir sna comhlachtaí poiblí;
- Gan úinéireacht a bheith glactha ag ardbhainistíocht na gcomhlachtaí poiblí ar na scéimeanna teanga;
- Easnaimh ó thaobh soláthar seirbhísí go dátheangach sna scéimeanna teanga i gcoitinne;
- Easnamh maidir le poibliú na seirbhísí atá ar fáil go dátheangach agus easpa éilimh dá

réir;

- Gan aitheantas a bheith tugtha don ghá le plean margaíochta do sheirbhísí dátheangacha a fheidhmiú chun éileamh ar sheirbhísí a fhorbairt.
- Easpa soiléireachta maidir leis an bhfriotal sna scéimeanna teanga - Ní mór a rá go bhfuil gá le friotal cruinn i scéimeanna teanga na gcomhlachtaí poiblí lena chinntiú go gcuirfear seirbhís dhátheangach ar fáil don phobal ar chomhchaighdeán maraon le soiléireacht don chomhlacht agus d'fhoireann na comhlachta maidir le gealltanais na scéime a chur i bhfeidhm;
- Easpa comhoibrithe i gcásanna áirithe idir eagraíochtaí gaolmhara agus iad ag forbairt a gcuid seirbhísí trí Ghaeilge;
- Easpa comhchomhairle leanúnach idir comhlachtaí poiblí agus an pobal i gcoitinne lena chinntiún go bhfuil an comhlacht ag freastal ar riachtanais an phobail i leith seirbhísí dátheangacha;
- An gá le líonra de Ghaeilgeoirí a chruthú sna comhlachtaí poiblí chun feasacht teanga a láidriú, agus chun baill foirne eile a spreagadh d'fhonn cur le húsáid laethúil na Gaeilge sna comhlachtaí poiblí.

**12. Céard iad na leasuithe a mholfa ar an Acht le forbairt a dhéanamh ar sheirbhísí Stáit trí Ghaeilge ar bhonn éifeachtach agus éifeachtúil ó thaobh costais de?**

Cur leis an gcóhórt den fhoireann sa tseirbhís phoiblí atá inniúil sa Ghaeilge trí pholasaí earcaíochta a chur ar bun faoi bhun rialachán reachtúla a chinnteodh go mbeadh céatadán áirithe, ar a laghad 20% d'fhoirne na gcomhlachtaí poiblí dátheangach agus inniúil seirbhís a sholáthar ar ardchaighdeán sa dá theanga oifigiúil.

Poist ar leith a aithint mar róil a bhfuil cumas sa Ghaeilge / cumas sa dá theanga oifigiúil riachtanach.

Chuirfeadh an dá mholadh thuas go mór le héifeacht, le héifeachtúlacht agus le táirgiúlacht sna comhlachtaí poiblí agus ghearrfadh siar go mór ar chostais aistriúcháin a bhaineann le bunseirbhísí a sholáthar trí mheán na Gaeilge.

Maidir le foilsiú cáipéisí agus foirmeacha go dátheangach, moltar réitithe leagan amach agus dearaidh a cheapadh chun costas fhoilsiú na gcáipéisí sin a choinneáil chomh híseal agus is féidir. I gcás cáipéisí ar leith nach mbíonn éileamh orthu i gceachtar den dá theanga oifigiúil, moltar iad siúd a fhoilsiú go leictreonach amháin.

Moltar go dtabharfaidh comhlachtaí poiblí aird ar an nGaeilge i bhforbairtí i réimse na cumarsáide dhigitigh agus go mbeadh aon bhfeachtais fógraíochta no feachtais phoiblí a bheadh á chur ar siúl sna hardáin dhigiteacha ar chomhchéim le feachtas cumarsáide i mBéarla. D'fhéadfadh na comhlachtaí cumarsáid níos éifeachtaí a dhéanamh, ar chostas i bhfad níos ísle agus cinnteoidh gníomhartha mar sin go mbeidh comhlachtaí agus rannaí stáit i dteagmháil le spriocphobail éagsúla, de réir mar a thiocfaidh fás agus forbairt ar na meáin shóisialta, an gréasán agus cumarsáid dhigiteach chun cinn sna blianta atá amach romhainn.

Chuir Aire na Gaeltachta in iúl sa Dáil le déanaí gur dócha go mbeadh costas níos mó ag baint le cónascadh feidhmeanna Oifig an Choimisinéara Teanga le hOifig an Ombudsman ná mar a bheadh i gceist le hOifig an Choimisinéara Teanga a fhágáil mar atá. Ar an mbonn sin, agus ar an mbonn gur laghdú sa tseirbhís don phobal a bheadh mar thoradh go díreach ar an mbeart sin, níl aon cheist faoi ach gur chóir Oifig an Choimisinéara Teanga a fhágáil mar oifig neamhspleách.